

**LINANGKOB NGA HISGOTANAN:
ANG DIOSNONG PAGPAAMBIT SA DIOSNONG TRINIDAD
ALANG SA DIOSNONG PAMATIGAYON**

Mensahe 5

**Ang Diosnong Pagpaambit sa Diosnong Trinidad
nga Gipadayag sa Basahon sa Efeso**

Basahong Kasulatan: Efe. 1:3-14; 2:18; 3:16-19; 4:4-6; 5:19-20; 6:10-11, 17

- I. Ang pinadayag bahin sa Tulo-usang Dios diha sa balaang Pulong dili man aron makasabot ta sa doktrina kondili aron ikapaambit ang Dios diha sa Iyang Diosnong Trinidad nganha sa pinili ug tinubos Niyang katawhan aron masinati ug mapahimuslan nila—2 Cor. 13:14:**
 - A. Gipadayag sa Biblia nga dili lang objectibong gituohan nato ang Tulo-usang Dios; subjectibo Siya para nato, nga nagpuyo sa sulod nato ug nagpaambit sa Iyang Kaugalingon kanato aron mahimong atong kinabuhi ug sangkap sa kinabuhi—Rom. 8:2, 6, 10-11.
 - B. Gisulat ang Biblia segun sa nagdumalang prinsipyo sa Tulo-usang Dios nga nag-umol sa Iyang Kaugalingon sa pinili ug tinubos Niyang katawhan isip ilang kinabuhi ug sangkap sa kinabuhi—Sal. 36:8-9.
- II. Ang Diosnong Trinidad maoy dugokan sa tibuok Biblia; gitagik sa Diosnong Trinidad ang tibuok Biblia, labi na gyod ang basahon sa Efeso:**
 - A. Ang Efeso ray basahon sa Biblia nga ang tanang capitulo gitagik sa Diosnong Trinidad isip sukaranong elemento niini.
 - B. Kon wala ta makaila sa Tulo-usang Dios, dili ta makasabot sa giladmon sa Efeso, kay ang Diosnong Trinidad may dugokan sa tanang capitulo niini—1:3-14; 2:18; 3:16-17; 4:4-6; 5:19-20; 6:10-11, 17.
- III. Ang tibuok pinadayag sa Efeso bahin sa pagpalugwa, pagkaanaa, pagtubo, pagtukod, ug pagpakig-away sa iglesia nga Lawas ni Cristo inumol sa diosnong pamatigayon ug sa diosnong pagpaambit sa Diosnong Trinidad nganha sa mga bahin sa Lawas ni Cristo; busa, ang mahinungdanong sentro sa Efeso mao ang diosnong pagpaambit sa Diosnong Trinidad nganha sa mga magtutuo:**
 - A. Gipadayag sa capitulo 1 nga gipili ug gitudlong daan sa Dios Amahan ang mga bahin sa eternidad, gitubos sila sa Dios Anak, ug gitimbrehan sila sa Dios Espiritu isip pasalig, sa ingon niana gipaambit ang Iyang Kaugalingon sa mga magtutuo Niya aron mahulma ang iglesia, nga mao ang Lawas ni Cristo, ang kahupnganan Niya nga nagpuno sa tanan ug naa sa tanan—vv. 3-14, 18-23:
 1. Gipadayag sa capitulo 1 sa Efeso ang lugwa sa pagpaambit sa nahikay nga Trinidad ug sa pagpalatay sa nilabaw kaayo nga Cristo.
 2. Ang lugwa sa pagpaambit sa Dios Amahan nagpadayag sa walay kataposang tuyo sa Dios (vv. 3-6), ang lugwa sa pagpaambit sa Dios Anak nagpadayag sa pagkahuman sa walay kataposang tuyo sa Dios (vv. 7-12), ug ang lugwa sa pagpaambit sa Dios Espiritu nagpadayag sa pag-aplikar sa nahuman nga tuyo sa Dios (vv. 13-14).
 3. Kay pagkalawas man sa Tulo-usang Dios ang labaw kaayo nga Cristo, ang labaw kaayong pagpalatay Niya naglakip gyod sa tanang madagayaong pag-

paambit sa Tulo-usang Dios; ang tulo-ka-pilo nga pagpaambit sa Tulo-usang Dios nalakip sa pagpalatay sa nilabaw kaayo nga Cristo ug nakompleto ug nahingpit diha sa malangkobon-sa-tanan nga pagpalatay sa nilabaw kaayo nga Cristo—vv. 15-23.

- B. Gipakita sa capitulo 2 nga diha sa Diosnong Trinidad may agianan ang tanang magtutuo, ang mga Judio ug mga Gentil, ngadto sa Dios Amahan pinaagi sa Dios Anak, diha sa Dios Espiritu—v. 18:
1. Nagpakita kini nga dungang naanaa ug nagpuy-anay sa usag usa ang tulo, bisan sa nahuman na ang tanang kahikayan sa pagpakatawo, pagkinabuhi ingog tawo, pagkalansang sa krus, ug pagkabanhaw.
 2. Pinaagi sa Dios Anak, nga Tighuman, ang palagianan, ug diha sa Dios Espiritu, nga Tigpatuman, ang pag-aplikar, may agianan ta ngadto sa Dios Amahan, nga Tigsugod, ang tinubdan sa atong pagpahimulos.
 3. Balak ta nga gisulat sa pagpaambit sa Amahan nga tinubdan, sa Anak nga agianan, ug sa Espiritu nga agay—v. 10.
 4. Ang pagpaambit sa Amahan nga magpalugwa sa obra maestra, ang pagpaambit sa Anak nga magpalugwa sa bag-ong tawo, ug ang pagdala sa Espiritu kanato ngadto sa Amahan diha sa usa ka Lawas moresulta sa pagkatukod sa iglesia ug sa pagkatuman sa walay kataposang pamatigayon sa Dios—vv. 10, 15-16, 21-22.
- C. Nag-ampo ang apostol sa capitulo 3 nga lig-onon unta sa Dios Amahan sa gahom ang mga magtutuo pinaagi sa Dios Espiritu nganha sa tawo nila sa sulod aron makabalay si Cristo, nga Dios Anak, sa ilang kasingkasing, sa ato pa, mookupar sa tibuok nilang pagkatawo, aron mapuno sila ug mahimong kahupnganan sa Tulo-usang Dios; kini ang kinalabwan sa pagsinati ug pag-ambit sa mga magtutuo sa Dios diha sa Iyang Diosnong Trinidad—vv. 16-19:
1. Ang Amahan maoy tinubdan, ang Espiritu maoy palagianan, ang Anak maoy tumong, ug ang kahupnganan sa Tulo-usang Dios maoy lugwa.
 2. Wala magbuhat alang sa Iyang Kaugalingon ang matag usa sa tulo; nagbuhat hinuon Sila para sa kahupnganan sa Tulo-usang Dios; matahom nga hulagway kini sa Diosnong Trinidad—itandi sa Mat. 12:28.
- D. Gipakita sa Efeso 4 nga nasagol sa Lawas ni Cristo ang nahikay nga Dios nga Espiritu, ang Ginoo, ug ang Amahan aron makasinati sa Diosnong Trinidad ang tanang bahin sa Lawas—vv. 4-6:
1. Ang Lawas ni Cristo maoy dapit nga kaugmaran sa Tulo-usang Dios.
 2. Ang diosnong pagpaambit sa Dios Amahan sa pagka-ibabaw Niya sa tanan, sa Anak sa pagka-agi Niya sa tanan, ug sa Espiritu sa pagka-naa Niya sa tanan maoy makapasinati ug makapapahimulos sa tanang bahin sa Lawas ni Cristo sa Tulo-usang Dios.
 3. Nagpadayag kining mga versiculoha sa upat ka persona—sa usa ka Lawas, usa ka Espiritu, usa ka Ginoo, ug usa ka Dios Amahan—nga nasagol pag-usa aron mahimong organicong Lawas ni Cristo; busa, upat-sa-usa ang Tulo-usang Dios ug ang Lawas.
- E. Gidasig sa capitulo 5 ang mga magtutuo nga magdayeg sa Ginoo, sa Dios Anak, uban sa mga awit sa Dios Espiritu, ug magpasalamat sa Dios Amahan diha sa ngalan sa atong Ginoong Jesucristo, sa Dios Anak—vv. 19-20:
1. Kini ang pagdayeg ug pagpasalamat sa nahikay nga Dios sa Diosnong Trinidad Niya aron mapahimuslan nato Siya nga Tulo-usang Dios.
 2. Pinaagi sa diosnong pagpaambit sa Diosnong Trinidad, maumol ta nga mga anak sa Dios, nga naggawi diha sa Dios nga gugma ug kahayang—vv. 2, 8.

- F. Gisugo ta sa capitulo 6 nga makig-away sa espirituhanong away sa pagkaginamhan nato diha sa Ginoo, sa Dios Anak, nga magsul-ob sa tibuok hinagiban sa Dios Amahan, ug mogamit sa espada sa Espiritu—vv. 10-11, 17:
1. Ang Dios Anak mao ang gahom nga naa nato, ang Dios Amahan nga naamgohan diha sa Anak mao ang hinagibang gisul-ob nato, ug ang Dios Espiritu mao ang espada, nga mao ang pulong sa Dios.
 2. Kini ang pagsinati ug pagpahimulos sa mga magtutuo sa Tulo-usang Dios bisan sa espirituhanong pakig-away.
- IV. Matod pa sa tibuok pinadayag sa kan-uman ug unom ka basahon sa Biblia, ang Diosnong Trinidad—ang Amahan, ang Anak, ug ang Espiritu—alang man sa pagpaambit sa Dios, sa ato pa, sa pag-apod-apod sa Dios nganha sa Iyang piniling katawhan; tulo-usa ang Dios aron makapaambit Siya sa Iyang Kaugalingon kanato, makaumol sa Iyang Kaugalingon kanato, aron mapahimuslan nato para matukod ta nga Lawas ni Cristo ug maandam nga mapangasaw-onon ni Cristo alang sa ikaduhang pag-anhi Niya sa mahimo nang gingharian sa atong Ginoo ug sa Iyang Cristo ang gingharian sa kalibotan nga harian Niya hangtod sa kahangtoran—Bug. 11:15.**